

بِسْمِ اللَّهِ الرَّحْمَنِ الرَّحِيمِ

Utangulizi:

Himdi zote Anastahiki Allaah (سبحانه وتعالى) Mola wa walimwengu wote, Rahma na amani zimshukie kipenzi chetu Mtume Muhammad (صلى الله عليه) na jamaa zake, na Swahaba zake (رضي الله عنهم) na wote waliotangulia kwa wema mpaka Siku ya Mwisho.

Imekuwa ni waajib wa kila Muislamu kufikisha ujumbe kwa kuamrisha na mema na kukatazana maovu kama Anavyoamrisha Allaah (سبحانه وتعالى):

﴿وَلْتَكُنْ مِنْكُمْ أُمَّةٌ يَدْعُونَ إِلَى الْخَيْرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ ۚ وَأُولَٰئِكَ هُمُ الْمُفْلِحُونَ﴾

((Na uweko (watokeze) kutoka kwenu Ummah unaolingania kheri na unaoamrisha ma'aruwf (mema) na unaokataza munkari. Na hao ndio waliofaulu))¹

﴿كُنْتُمْ خَيْرَ أُمَّةٍ أُخْرِجَتْ لِلنَّاسِ تَأْمُرُونَ بِالْمَعْرُوفِ وَتَنْهَوْنَ عَنِ الْمُنْكَرِ وَتُؤْمِنُونَ بِاللَّهِ﴾

((Mmekuwa Ummah bora kabisa uliotolewa (mfano) kwa watu; mnaamrisha ma'aruwf (mema) na mnakataza munkari na mnamwamini Allaah))²

Umuhimu wake umefikia upeo wa juu kabisa hadi kwamba baadhi ya Salafus-Swaalih (Wema Waliotangulia) na Ma'ulamaa wamezingatia kwamba lau zingekuwa nguzo za Kiislamu ni sita, basi ya sita yake ingelikuwa ni kuamrisha na mema na kukatazana maovu kwani Allaah (سبحانه وتعالى) Amewalaani waliopewa vitabu nyuma yetu kwa kutokutekeleza amri hiyo. Anasema Allaah (سبحانه وتعالى):

¹ Aal-'Imraan (3: 104)

² Aal-'Imraan (3: 110)

﴿لُعِنَ الَّذِينَ كَفَرُوا مِنْ بَنِي إِسْرَءِيلَ عَلَى لِسَانِ دَاوُدَ وَعِيسَى ابْنِ مَرْيَمَ ۚ ذَٰلِكَ بِمَا عَصَوْا
وَكَانُوا يَعْتَدُونَ ﴿٧٨﴾ كَانُوا لَا يَتَنَاهَوْنَ عَنْ مُنْكَرٍ فَعَلُوهُ ۚ لَبِئْسَ مَا كَانُوا
يَفْعَلُونَ ﴿٧٩﴾﴾

((Wamelaaniwa wale waliokufuru miongoni mwa wana wa Israaiyl kwa ulimi wa Daawuud na 'Iysaa mwana wa Maryam. Hivyo ni kwa sababu ya (kuendelea) kuasi kwao na walikuwa wakupindukia mipaka. Walikuwa hawakatazani maovu waliyofanya. Uovu ulioje waliyokuwa wakiyafanya))³

Bali kuna onyo kali la kuteremshiwa adhabu kwa kutokutekeleza amri hii na juu ya hivyo, ni sababu mojawapo ya kutokutakabaliwa du'aa zetu kama ilivyothibiti katika usimulizi ufuatao:

عن حُذَيْفَةَ بْنِ الْيَمَانِ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ: ((وَالَّذِي نَفْسِي بِيَدِهِ لَتَأْمُرَنَّ بِالْمَعْرُوفِ وَلَتَنْهَوْنَ
عَنِ الْمُنْكَرِ وَلَيُوشِكَنَّ اللَّهُ أَنْ يَبْعَثَ عَلَيْكُمْ عِقَابًا مِنْهُ فَتَدْعُونَهُ فَلَا يَسْتَجِيبُ لَكُمْ)) (الترمذي وصححه الألباني)

Imepokelewa toka kwa Hudhayfah bin al-Yamaani (رضي الله عنه) kutoka kwa Mtume kwamba amesema: **((Naapa kwa Yule nafsi yangu ipo mikononi mwake, mtaamrisha ma'ruwf [mema] na kukatazana munkari [maovu] ama Atawaunganishia kwa kuwapa mfano wake Allaah na kuwatemshia nyinyi adhabu itokayo Kwake, kisha mumuombe Yeye na Asiwajibu du'aa zenu))**⁴

Zimethibiti pia Hadiyth nyinginezo za Mtume (صلى الله عليه وآله وسلم) zinazotoa maonyo zaidi ya hayo na zinazobashiria fadhila tukufu za kuamrisha mema na kukatazana maovu. Na hii ilikuwa ndio kazi ya Mitume wote kuwalingania watu wao waachane na maovu na washikamane na yanayomridhisha Allaah (سبحانه وتعالى). Na kutokana na umuhimu wake, Mtume (صلى الله عليه وآله وسلم) ametuamrisha tufikishe ujumbe japo kwa Aayah moja kama alivyosema:

((بَلِّغُوا عَنِّي وَلَوْ آيَةً))

((Fikisheni kutoka kwangu [ujumbe] japo Aayah moja))⁵

³ Al-Maaidah (5: 78-79)

⁴ At-Tirmidhiy na akaisahihisha Al-Albaaniy

⁵ Al-Bukhaariy

Kitabu hiki kwa tawfiyq ya Allaah (سبحانه وتعالى), kitamsaidia yeyote anayetaka kufuata amri ya Allaah (سبحانه وتعالى) na Mjumbe Wake (صلى الله عليه وآله وسلم), kwani Hadiyth moja itamtosheleza kabisa mtu kulingania kutokana na maamrishi na makatazo yake.

Hadiyth zote (isipokuwa ya Hitimisho) nimezitoa katika kitabu cha Riyaadhus-Swaalihiyn kwa kuingia katika Milango yake na kutoa Hadiyth moja au zaidi yake ambazo nimehisi kuwa zina mafunzo muhimu kwa Muislamu na jamii kwa ujumla.

Nimejaribu kutoa '**Mafunzo Na Hidaaya**' katika kila Hadiyth kwa kuweka nukta za maelezo mafupi⁶. Pia nimetaja Aayah za Qur-aan zinazohusiana na baadhi ya nukta nilizotaja kwa kuona kuwa zitamsaidia mtu kuisherehi zaidi Hadiyth moja ikawa ni darsa kamili la kumtosheleza na kuwatoshleleza anaowalingania. Kitabu hiki kinaweza pia kuwa ni mazoezi kwa mtu ikawa ni chanzo cha kutoa darsa kwa wenziwe.

Namshukuru Allaah (سبحانه وتعالى) Kuniwezesha kuandika Kitabu hiki cha **Lulu-um-Manthuwrn** (Lulu Zilizotawanywa) kwani hakuna Awezeshaye ila Yeye tu:

﴿وَمَا تَوْفِيقِي إِلَّا بِاللَّهِ عَلَيْهِ تَوَكَّلْتُ وَإِلَيْهِ أُنِيبُ﴾

((Na sipati kuwezeshwa haya ila na Allaah. Kwake Yeye ninategemea, na Kwake Yeye naelekea kutubia))⁷

Shukurani zangu za dhati kwa al-Akh Abu 'Abdillaah Muhammad Baawazir, al-Akh Sa'iyd Baawazir, al-Akh Muhammad 'Abdallah Al-Ma'awiy na al-Akh 'Abdallah Mu'aawiyah kwa juhudi zao za kukipitia kitabu hiki, namuomba Allaah (سبحانه وتعالى) Awalipe malipo mema yawe mazito katika mizani zao za mambo mema Siku ya Qiyaamah. Aaamiyn.

Na namuomba Allaah (سبحانه وتعالى) Ajaalie kazi hii iwe kwa ajili ya kupata Radhi Zake Pekee na Ajaalie iwe yenye manufaa kwa ndugu zetu wa Kiislamu na namuomba Atughufurie na Atusamehe kwa makosa yoyote yatakayokuwemo.

⁶ Baadhi ya nukta nimenukuu kutoka :Nuzhatul-Muttaqiyn

⁷ Huwd (11: 88)

Wa-Swalla-Allaahu 'alaa Muhammadin wa 'alaa aalihi wa Swahbihi wa
sallam.

Ummu Iyyaad

14 Dhul-Qa'dah, 1432– 12 Oktoba 2011M